



## ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

### Ո Ր Ո Շ ՈՒ Մ

#### ԹԻՎ ԿՎ/02/2022 ԿԱՐԳԱՊԱՀԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

ք. Երևան

«16» մայիսի 2022թ.

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ա. Փաշինյանի, Ն. Համբարձումյանի (այսուհետ՝ Հանձնաժողով), ուսումնասիրելով ՀՀ վերաքննիչ քաղաքացիական դատարանի դատավոր Հարություն Վոլոդյայի Ենոքյանի կողմից հայտարարագրման ենթակա տվյալը «Հայտարարատու պաշտոնատար անձի 2020 թվականի գույքի, եկամուտների և շահերի» տարեկան հայտարարագրում սխալ ներկայացնելու փաստի առթիվ 2022 թվականի մայիսի 13-ի N ՎԻՎ 14/22 որոշմամբ հարուցված վարչական իրավախախտման վերաբերյալ գործի վարույթի հիմքով հարուցված 2022 թվականի մայիսի 13-ի N ԿՎ/02/2022 կարգապահական վարույթի նյութերը.

### Պ Ա Ր Զ Ե Ց

#### **1. Գործի նախապատմությունը.**

Կարգապահական վարույթ հարուցելու առիթ է հանդիսացել ՀՀ վերաքննիչ քաղաքացիական դատարանի դատավոր Հարություն Վոլոդյայի Ենոքյանի կողմից 2021 թվականի մայիսի 17-ին ներկայացված «Հայտարարատու պաշտոնատար անձի 2020

թվականի գույքի, եկամուտների և շահերի» տարեկան հայտարարագրի (այսուհետ՝ Հայտարարագիր) Բ.6.1 «Բանկային հաշիվների մնացորդներ» բաժնում՝ տարեվերջին, հայտարարագրել է 203,212 (երկու հարյուր երեք հազար երկու հարյուր տասներկու) ՀՀ դրամ անկանխիկ դրամական միջոցները չհայտարարագրելը այն պարագայում, երբ ՀՀ կենտրոնական բանկից ստացված տեղեկատվության համաձայն՝ Հարություն Ենոքյանի բանկային հաշվին 2020 թվականի դեկտեմբերի 31-ի դրությամբ առկա է եղել 439,109 (չորս հարյուր երեսունինը հազար հարյուր ինը) ՀՀ դրամ: Նշված առերևույթ խախտման առնչությամբ 2022 թվականի մայիսի 13-ին Հանձնաժողովի որոշմամբ հարուցել է թիվ N ՎԻՎ14/22 վարչական իրավախախտման վերաբերյալ գործի վարույթը:

2022 թվականի մայիսի 13-ին Հարություն Ենոքյանը հրավիրվել է Հանձնաժողով և նրա մասնակցությամբ կազմվել է վարչական իրավախախտման վերաբերյալ թիվ ՎԻՎ14/22 արձանագրությունը՝ «Վարչական իրավախախտումների վերաբերյալ» ՀՀ օրենսգրքի 169.28-րդ հոդվածի 5-րդ մասով նախատեսված առերևույթ իրավախախտման հատկանիշով:

1.3 Հարություն Ենոքյանի կողմից 2022 թվականի մայիսի 13-ին Հանձնաժողովին է ներկայացվել \_\_\_\_\_ ընկերության կողմից սպասարկվող բանկային հաշվի վերաբերյալ քաղվածք՝ հասատատված բանկի կողմից:

1.4 Վարչական իրավախախտման վերաբերյալ գործի քննությունը նշանակվել է 2022 թվականի մայիսի 16-ին:

## **2. Վարույթի մասնակցի բացատրությունը.**

Հարություն Ենոքյանը գրավոր բացատրությամբ, մասնավորապես, հայտնել է, որ 29.12.2020 թվականի դրությամբ \_\_\_\_\_ ունեցած իր բանկային հաշվի մնացորդը կազմել է 401.767,30 դրամ, որից հաջորդ օրը՝ 30.12.2020 թվականին, կանխիկացրել է 200.000 ՀՀ դրամ, ինչպես նաև հաշվին նույն օրը մուտքագրվել է 1605,60 ՀՀ դրամ, և ելքագրվել է 160,60 ՀՀ դրամ: Հարություն Ենոքյանը նշել է, որ արդյունքում բանկային հաշվի մնացորդը 30.12.2020 թվականի դրությամբ՝ օրվա վերջում, կազմել է 203.212,30 ՀՀ դրամ, որն էլ նույնությամբ արտացոլվել է իր կողմից ներկայացված 2020 թվականի տարեկան հայտարարագրում:

Նշել 30.12.2020 թվականին կանխիկացրած 200.000 ՀՀ դրամի ձևակերպումն, ըստ բանկային հաշվի քաղվածքի, կատարվել է 08.01.2021 թվականին, հետևաբար այն չի արտացոլվել Կենտրոնական բանկի տվյալներում 31.12.2020 թվականի դրությամբ:

**3. Որոշումն ընդունելու իրավական և փաստական հիմքերը, հիմնավորումները և պատճառաբանությունը.**

3.1 Հարություն Ենոքյանը «Հանրային ծառայության մասին» օրենքի (այսուհետ՝ նաև Օրենք) 34-րդ հոդվածի համաձայն հանդիսանում է գույքի, եկամուտների և շահերի հայտարարագրման պարտականություն ունեցող անձ:

3.2 Օրենքի 40-րդ հոդվածի 1-ին մասի 7-րդ կետի համաձայն՝ հայտարարագիրը ներառում է հայտարարատուին սեփականության իրավունքով պատկանող դրամական միջոցները (այդ թվում՝ բանկում ունեցած), իսկ հոդվածի 3-րդ մասի 7-րդ կետի համաձայն՝ գույքը հայտարարագրելիս նշվում են դրամական միջոցի դեպքում՝ դրամական միջոցի չափը, ծագման աղբյուրը, տեսակը, արժույթը: Դրանից բացի՝ նույն հոդվածի 7-րդ մասով նախատեսված է, որ դրամական միջոցի դեպքում տարեկան հայտարարագրում ներառվում են տվյալ տարվա **հունվարի 1-ի և դեկտեմբերի 31-ի** դրությամբ դրամական միջոցի չափը, ծագման աղբյուրը, տեսակը և արժույթը:

3.3 Օրենքի 41-րդ հոդվածի 4-րդ մասի 1-ին կետի համաձայն՝ հայտարարագրման ենթակա են Հայաստանի Հանրապետության դրամով, արտարժույթով կամ քնամթերային (ոչ դրամական) ձևով ստացված աշխատանքի վարձատրությունը կամ դրան հավասարեցված այլ վճարումները:

3.4 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 6-րդ կետի համաձայն՝ Հանձնաժողովը քննում և լուծում է հայտարարագրմանն առնչվող խախտումների վերաբերյալ գործեր:

3.5 «Վարչական իրավախախտումների վերաբերյալ» օրենսգրքի 244.17-րդ հոդվածի համաձայն՝ օրենսգրքի 169.28-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

3.6 «Վարչական իրավախախտումների վերաբերյալ» ՀՀ օրենսգրքով 247-րդ հոդվածով սահմանված իրավանորմի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման նույն հոդվածի 1-ին կետով սահմանված հանգամանքների դեպքում, այն է՝ **վարչական իրավախախտման դեպքի** կամ կազմի **բացակայությունը**:

Հանձնաժողովը, համադրելով գործում առկա փաստական հանգամանքները, դրանց նկատմամբ կիրառելի իրավական նորմերի պահանջների հետ, վարչական իրավախախտումների վերաբերյալ գործի վարույթում հաստատված է համարել, որ իրավախախտան դեպքը բացակայում է հետևյալ պատճառաբանությամբ.

ընկերության կողմից Հարություն Ենոքյանի անվամբ սպասարկվող բանկային հաշվի քաղվածքում առկա տվյալների համաձայն՝ հաշվում առկա դրամական միջոցների ելքեր են կատարվել 30.12.2020 թվականին (200.000 ՀՀ դրամ, 160,60 ՀՀ դրամ), ինչպես նաև մուտքագրվել է 1605,60 (հազար վեց հարյուր հինգ դրամ վաթսուն լումա) ՀՀ դրամ, որոնց վերաբերյալ քաղվածքում համապատասխանաբար առկա ձևակերպումների (հաշվարկի ապահովման) ամսաթիվ է նշված 08.01.2021 թվականը: Նվաճով պայմանավորված՝ Հանձնաժողովը գործով հաստատված հանգամանք է համարել, որ Հարություն Ենոքյանը 2021 թվականի մայիսի 17-ին ներկայացված «Հայտարարատու պաշտոնատար անձի 2020 թվականի գույքի, եկամուտների և շահերի» տարեկան հայտարարագրի (այսուհետ՝ Հայտարարագիր) Բ.6.1 «Բանկային հաշիվների մնացորդներ» բաժնում՝ տարեվերջին հայտարարագրել է 203,212 (երկու հարյուր երեք հազար երկու հարյուր տասներկու) ՀՀ դրամ անկանխիկ դրամական միջոցներ:

«Հայաստանի Հանրապետության դատական օրենսգիրք» սահմանադրական օրենքի (այսուհետ՝ Սահմանադրական օրենք) 69-րդ հոդվածի 1-ին մասի 15-րդ կետի համաձայն՝ ցանկացած գործունեություն իրականացնելիս և բոլոր հանգամանքներում դատավորը պարտավոր է ներկայացնել գույքի, եկամուտների, շահերի և ծախսերի հայտարարագիր «Հանրային ծառայության մասին» օրենքին համապատասխան և այդ օրենքով նախատեսված պահանջների պահպանմամբ:

Սահմանադրական օրենքի 67-րդ հոդվածի համաձայն՝ Դատավորը պարտավոր է պահպանել սույն օրենսգրքով սահմանված վարքագծի կանոնները: **Վարքագծի կանոնները չպահպանելը սույն օրենսգրքով սահմանված դեպքերում և կարգով կարող է հանգեցնել դատավորի կարգապահական պատասխանատվության:**

Սահմանադրական օրենքի 147-րդ հոդվածի 6-րդ մասի 1-ին կետի համաձայն՝ վարույթ հարուցած մարմինը կարճում է կարգապահական վարույթը, եթե՝ **առկա չէ կարգապահական պատասխանատվության ենթարկելու հիմք:**

Ելնելով վերոնշյալից՝ Հանձնաժողովը հաստատված է համարում, որ ՀՀ վերաքննիչ քաղաքացիական դատարանի դատավոր Հարություն Վոլոդյայի Ենոքյանի նկատմամբ 2022 թվականի մայիսի 13-ի հարուցված թիվ N ԿՎ/02/2022 կարգապահական վարույթում առկա չէ վերջինիս կարգապահական պատասխանատվության ենթարկելու հիմքը:

Հաշվի առնելով վերոգրյալը և ղեկավարվելով «Հայաստանի Հանրապետության դատական օրենսգիրք» սահմանադրական օրենքի 147-րդ հոդվածով, «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով և 25-րդ հոդվածի 6.1-րդ մասով՝ Հանձնաժողովը.

## Ո Ր Ո Շ Ե Ց

1. ՀՀ վերաքննիչ քաղաքացիական դատարանի դատավոր Հարություն Վոլոդյայի Ենոքյանի նկատմամբ 2022 թվականի մայիսի 13-ին հարուցված թիվ N ԿՎ/02/2022 կարգապահական վարույթը կարճել՝ կարգապահական պատասխանատվության ենթարկելու հիմքի բացակայությամբ:

2. Սույն որոշումը եռօրյա ժամկետում ուղարկել Հարություն Ենոքյանին, Դատավորների ընդհանուր ժողովի Էթիկայի և կարգապահական հարցերի հանձնաժողով և ՀՀ արդարադատության նախարարին:

ՀԱՆՁՆԱԺՈՂՈՎԻ ՆԱԽԱԳԱՀ



ՀԱՅԿՈՒՎԻ ՀԱՐՈՒԹՅՈՒՆՅԱՆ